



### La famiglia Muggli

In per notizias da famiglia da Leci Antoni Brugger, nudadas il mars 1946  
Sefundont empau sin il cudisch „Emigraziun tujetschina ell'America“ da Guglielm Gadola.  
Elavurau da Tarcisi Hendry

Igl onn 1854 ei emigraus da Rueras Giachen Antoni Muggli cun dunna e treis affons. El era frar dil tat da scribent da questas lingias: Leci Antoni Muggli rodè sco el vegneva numnaus. Els eran derivonts da Surrein/Tujetsch ed eran stai sis frars ed ina sora. Ils dus sura numnai e lu in ius ella America gia 1851 cun dunna ed in affon. Il quart fuva Gion Rest, staus a Cuera silla canzlia cantunala, bab dil perdert Cristian Muggli. Il tschunavel era maridaus en Baviera, l'emprema dunna ei stada in Monn da Sedrun; la secunda dunna ei stada Rosa Muggli, sora dalla Barla Muggli, mumma dils Decurtins da Sedrun. Il sisavel era morts ell' Italia en survetsch jester. La sora Barla Muggli era ida ell' America cun siu frar Giachen Antoni.

Descendents da Martin Antoni Muggli (1777-1823) maridaus cun Maria Giuseppa Degonda (1778-1848):

1. Leci Antoni rodè Muggli	8 uost 1805	25 avrel 1893	
oo Onna Maria Maculin	4 fevrer 1805	11 avrel 1890	
2. Giachen Antoni Muggli	4 schaner 1808		Ella America (1854)
oo Onna Maria Schmid	26 november 1819		
3. Giachen Martin Muggli	10 avrel 1810		
4. Maria Barla Catrina Muggli	24 uost 1811	1855	Ella America (1854)
5. Giusep Antoni Muggli	10 avrel 1815		
6. Giachen Martin Muggli	mars 1818		Ella America (1851)
oo Margreta Cristgina Schmid	6 settember 1825		
7. Gion Cristian assissten Muggli	16 schaner 1821	20 fevrer 1860	Cuera, canzlia cantunala
oo Maria Margarita Fausta Venzin	4 settember 1829	1898	
secunda dunna da Gion Cristian assissten Muggli:			
oo Maria Barbara Catarina Venzin	5 uost 1820	1857	
8. Gion Antoni Muggli	20 uost 1823		Emigraus en Baviera
oo Onna Maria Monn	1823		
secunda dunna da Gion Antoni Muggli:			
oo Rosa Martina Muggli	15 schaner 1848		

Quels siat fargliuns han baghegiu 1831 la casa odem il vitg, habitada oz da Sep Martin Beer-Muggli. Els havevan planisau da baghegiar quella casa dadens baselgia, nua che stat oz il baghetg da Riedi e Caduff. Lu seigien ils augs da Surrein vegni e fatg sfracs. Els detschien ordavon, ch'els vegnien a gidar nuot ni cun lavur ni auter, sch'ei baghegien en quei liug. Els hagian cavau glied morta avunda ord la

lavina senza semetter da bi bugen el prighel. Perquei ei la casa oradem il vitg, stau meglier, schegie per vischinar ed ira en baselgia fuss stau leuen pli cumedeivel.

Quels frars eins tuts maridai. Gion Rest ha maridau ina feglia da mistral Venzin e giu sequents affons: Cristian, Rosina, maridada Cagienard da Rabius, Maria, maridada cun dr. Condrau vegl Mustér, morts senza affons, giuven; e lu aunc in Casper, fiers da tiers sur la punt giu e negaus, tratgs ord il Rein sco bara ora la Punt baselgia.

Descendents da Gion Cristian assissten Muggli (1821-1860) maridaus l'emprega gada cun Maria Barbara Catarina Venzin (1820-1857); la secunda dunna ei stada Maria Margarita Fausta Venzin (1829-1898)

Affons:	naschienscha	mort	Remarcas
Maria Cristina Muggli	11 settember 1850	1850	
Cristian Martin Muggli	30 fenadur 1851	1907	Negina descendenza
oo Margareta Cristina Beer	20 uost 1846	23 mars 1930	
Onna Maria Muggli	25 mars 1853		
oo Augustin Fidel Anton Condrau	29 uost 1846		
Casper Giusep Antoni Muggli	19 fevrer 1855	1863	Negaus el Rein
Rosina Muggli	17 fenadur 1856		
oo Johann Baptist Alexander Cagienard	26 october 1841		da Rabius
Giusep Muggli	2 avrel 1859	1859	

Cristian Muggli-Beer ha giu negina descendenza.

Leci Antoni haveva maridau Onna Maria Maculin che habitava sin Crestas ed han giu sequents affons: Treis feglias, la Culastia ei stada la mumma dil scribent da questas lingias e dil sur canoni Giusep Aluis Brugger; las autras duas soras ein mortas ledias, dils fegls, in ei restaus cheu maridaus e giu duas feglias; Duri Battesta giu mo feglias, cusrin Cristian negins affons; aschia ei la schlatteina Muggli ida giu en Tujetsch. L'auter feagl da Leci rodè ei Gion Fidel Muggli-Muggli, dil qual nus vegnin a scriver empau sefundont da brevs salvadas si da siu bab, quei pli tard.

Descendents da Leci Antoni rodè Muggli (1805-1893) maridaus cun Onna Maria Maculin (1805-1890):

Affons:	naschienscha	mort	Remarcas
Barla Cristgina Muggli	8 november 1833	7 october 1911	ledia
Maria Culastia Muggli	4 mars 1836	28 fevrer 1911	
oo Giusep Aluis Brugger	11 mars 1839	3 november 1911	
Gion Fidel Muggli	16 schaner 1839	29 december 1916	Ella America 1872
oo Onna Maria Muggli	20 october 1838	14 avrel 1920	
Onna Maria Muggli	8 zercladur 1843	6 schaner 1910	ledia
Duri Battesta Muggli	23 matg 1849	16 mars 1922	
oo Barla Catrina Monn	17 october 1852	6 zercladur 1930	

Ussa tuornel anavos tier Giachen Antoni Muggli per cuntinuar mia lavur. Ina beadia dil numnau Giachen Antoni Muggli ei stada igl onn 1927 ina cuorta viseta tier nus e sin fundament da quei che quella perdita matta ha raquintau mettel ensemen questas notizias. Per far cuort numnel grad mo aug Giachen. Quel era sco detg avon semess sin viadi per l' America 1854 cun dunna Anna Maria Schmet e treis affons, in buob Giachen Martin, duas buobas. Els habitavan la casa, la mesa, che ei oz da Toni Peder. Quella sissum numnada beadia Roas, beadia da aug Giachen e feglia da Giachen Martin ha cun carezia ardenta considerau e fotografau la casa enten la qualla fuva staus naschius siu car bab ed onda Josefina. Nus vulein avon che ira vinavon emprender d'enconuscher quella Rosa Muckley; aschia vegn scret Muggli per engles. Ella ei scolasta secundaria e Miniapolis. Ils stadi Minnesota haveva dau ora in premi, che quels scolasts che fetschien la megliera lavur sur quei e quei tema, sappien far in viadi en Europa ed era girar l'Europa e far studis per la scola americana. Denter quels favorisai haveva

era nossa Rosa giu il cletg. Ella haveva visitau Paris, haveva encuretge si Verdun, ed era anflau la fossa da siu spus curdaus ell'uiara 1914 - 1918. Ella haveva visitau Athen ed auters gronds marcaus europeics. Cun entusiassem plidava ella da Ruma e dil papa, sco era dallas bialas baselgias, mo quei pari ad ella, nunditgond las bialas baselgias, pietad seigi pli bia en l' America tiels buns.

Suenter quels bials viadis ha la Rosa aunc vuliu encurir il liug nativ da siu bab, sco era ils restonts parents e denter quels ha sribent da questas giu il cletg da dar letg e plidar empau cun quella perderta persuna.

Da quei di naven havein nus dus zavrins adina purtau carezia ed attaschdada in a l'auter.

Quei che ella ha discurrettu mettel ussa per scret, aschi lunsch sco hai aunc en memoria. Siu tat Giachen Muggli haveva stuiu star ditg sin l'aua (quetel da 60 dis) e la finala vegnius a riva a Ohio, cheu eis el secolocaus e fatg miseria. Beingleiti stuiu schar murir ina buoba naschida aunc a Rueras. E cheu di el, ch' el seigi staus il caluster, che hagi cavau la fossa ed il prer, che hagi satrau, seigi el era staus, ils parents suenter bara, sia dunna. Mo igl ei buca iu aschi ditg ch'era il bab ei suandaus igl affon. Nus schein bugen: Ils buns pren Niessegner. Aug Giachen fuvi veramein in bien. La paupra vieua cun ses dus affons restada anavos en in liug jester; po ins cumprender co ella ha fatg miseria.

Siu quinau Giachen Martin Muggli, che haveva era maridau ina sia sora ha envidau ella a Stillwater. El sappi gidar nuot havend sez nuot, mo el marcau plitost detschi enzatgei fadigia. Quei clom ha la paupra vieua suandau. El marcau ha lu la bandunada vieua anflau in bien cumpogn per la veta en la persuna da Gion Alig da Trun. Beingleiti suenter la maridaglia han els enderschiu, ch ins sappi cumprar a St.Henri prau per cultivar e runcar. Essend els dad origin purs e temend era buca la lavur fadiusa; mo saver far sin ina u l' outra moda il da viver, ein els cun curascha semess sin viadi per St.Henri. Leu cumprau prau e runcau e fatg ina paupra veta. Tut era aunc aschi vit e primitiv. Per igl emprem han els stuiu baghegiar ina habitaziun; stuein numnar ina tegia. Fatg si cun lenna rodonda e stuppau las ruosnas cun tschespet; quella tiara era buna e taccavi bein; spezia d'arschella. Fatga la tegia hagi quella ditg stuiu survir sco stiva, cuschina e dormitori. Cazzola negina, quei stuevi in fiug en la furnascha sclarir ils basegns. Varga in onn hagian ei era giu negin sal; stuevien magliar mal ed aunc tut fad. Ina famiglia Tambornini da Trun, ch' eri gia secolocada leu avon; hagi lu schenghegiu ad els in purschi pign, raps da cumprar havevien ei nuot; quel hagian ei tratg si gronds e lu vendiu per vegnir tier raps. Il tgau denton sez salvau. Mo quei pudevi la tatta buca plidar avunda, tgei perdanonza quei eri stau. Nus capin denter tonta, denter tonta aischa miseria, ch' il tgau purschi era staus perdanonza per quella paupra glieud. Discurrend la tatta en ses vegls dis dallas miserias, ch' els havevan fatg atras lu schevien ellas las beadias: Mo cara tatta, quei era schon onns da paupra miseria. O na, schevi la tatta quei ei onns che jeu patratgel anavos bugen. Quei era cars onns, pertgei nus havevan la cuntentientscha e la pasch.

Pli tard mavien ils umens il Tambornini ed igl Alig giu el marcau e cumpravien empau frina sal e schiglioc necessari. Ei eri in viadi da plirs dis e fetg stentus, vias neginas, il cumprau purtavien ei sin ina grat; mo essend, ch'ei mavi ensi havevi quel davos pli hefti, perquei sebratavien ei lu giu. Con ditg quella veta aschia ha cuzzau savein nus deplorablamein buca dir. Ei ha lu dau ina viulta. Giu ella Bassa han ins entschiet cun baghegiar las viasfier. Da quella occasiun ha era il bien Alig seprofitau. El fadigiava e la dunna luvrava la tiara ed aschia fatg fatschentas; la fatschenta carscheva ed era la famiglia tier ils dus affons da aug Giachen per miert eri aunc vegniu in per mattauns Alig.

Giachen Martin Muggli staus carschius ha dau scola 16 onns e lu maridau 1882 e fatg il pur 25 onns a St. Henri. Silsuenter serendius a Mineapolis per schar studegiar sin la universitad duas feglias, che havevan schon dau scola avon, ina ei la Rosa dalla quala hai il sura scret. Ina outra feglia cun num Margheta ei era stada ora tier nus suenter la Rosa. Quella ha da survigilar Uniuns samaritanas e sto per quei intent girar bia per la tiara entuorn. Sco Giachen Martin scriva en ina da sias brevs; ei vegnida baghegiada 1870 la baselgia a St.Henri e dedicada a s.Heinric. El era scolast e scriveva bialas brevs, era sia sora Josephina scriveva, possedein aunc biaras brevs; podein dir tscheu grad sper la tgina primitiva. Josephina ha maridau in Wenzin da S.Roc/Medel, ha giu treis mattas. Quei Wenzin ei staus

ora in onn ed era visitau nus a Rueras; sia dunna, nosa cara cusrina Josephina (aunc buca veglia) vuliu semetter giu per tschenar, dada entuorn e stada ina bara.

Avon che bandunar quels cars zavrins seigi aunc remarcau: Giachen Martin e siu cusrin Gion Fidel sil qual nus vegnin ussa, quels havevan biars onns planisau da far ensemen in viadi ella cara patria veglia, schizun ils daners stuevien star d'in maun pinai per quei intent, mo rumpend ora l'uiara 1914 ein ils plans falli. Duront 1914 - 1918 ein els viagai ella perpetnadad. Mo il bab Martin ha aunc detg alla feglia Rosa: Fai ti quella viseta, che jeu sundel buca vegnius da far. Cheu pusepi in mussament da carezia egl jester per la patria. In Gion Antoni Monn, miu quinau, ch' era staus adina giul Schuob; vegnend dallas plauncas Niregl viaden e viu suenter biars biars onns il clutger dalla baselgia da Sedrun; lu hagi el bargiu larmas. El ed ina feglia vegnevien sin la primizia dil nevs Maurus Brugger, fegl da sia sora Maria Culastia Monn. Carezia mai stizzada per la patria.

Dapi che havevan econuschiu in l'auter tier la viseta da 1927, havein adina corrispundiu. Igl onn 1942 ha ella dau si ina carta ils 16 da fenadur ed havein retschert ils 5 da november. (Quella haveva giu pli ditg, ch'ils cardinals, ch' ein sgulai a Ruma en 16 uras sco las gasettas raportan cun caschun dil consistori 1946) Duront ils onns 1942 entochen 1945 ei stau interrut, lura havein puspei giu novas in da l'auter. Tenor pader Baseli haveva Giachen Antoni Schmid, che nus havein empriu d'enconuscher, giugau a Rueras la pli impurtonta rolla tier il teater, che haveva fatg il Sten nair, sco el vegneva numnaus, cun quei teater vuleva il Sten nair tucclar la politica malsauna da quei temps. La politica malsauna da gliez temps stueva nies aug Giachen representar. La dunna di Giachen, che haveva entuppau a Ohio a Stilwater ed a St. Henri fuva ina feglia d'in frar dil Sten nair. Perquei aunc ina notizia da quei fin utschi sco el era enconuschiu. Tier in process, che la vischnaunca havevi pervia da tiarms, duessi igl advocat cuntrari haver detg: Manavas ora vies Sten cun siala e cavagl, Vus havevas il profit.



### **Gion Fidel Muggli-Muggli**

Gion Fidel Muggli-Muggli, fegl da Leci Antoni Muggli rodè, sco avon gia scret; ha bandunau Sedrun ils 4 d' avrel 1872. El habitava la mesa casa il pli odem il vitg da lezzas uras; suenter biars onns han ils Venzins da mulin cumprau e habitau ella, oz restas ei buca aschi ditg vit. En brev dils 16 da matg 1872 raquenta el co ei seigi passau sin viadi. Semess sin l' aua ils 12 d'avrel e stai sin l' aua 18 dis; pertgei havein stuii ira da Le Havre a Liverpool e leu stuii spitgar treis dis il bastiment a vapur. Sin quei bastiment fuvan nus melli e siattschien emigronts. Arrivai a New York haveva nies cumpogn Wolf (Trun?), che haveva saviu ira avon procurau per quartier. Da leu a St.Henri tertgaven nus da far en quater dis e notgs e havein giu diesch dis. Arrivai a St.Henri ils 9 da matg tier aug Gion Alig e l'onda; staunchels e senza daners.

En l'autra brev raquenta el tgei el hagi luvrau entochen ussa. Igl emprem runcau ora circa in acre (4047qm) prau agl aug Gion Alig, quei cun temps e peda; havend basegns da ruassar ora dil liung viadi; suenter sundel ius cun il Friberg a cavar fontaunas; jeu stuevel star sin tiara e trer siado cun ina sadiala il material; mo quei era per mei memia stretg, bein marvegl tochen sera en tutta calira; staunchels sco jeu erel aunc. Suenter sundel ius cun Michel da Cazis a luvrar da scrinari; mo en diesch dis havevan finiu la lavur. Ils farmers fan pli bugen sez e laian stgisar starschau. Ina fontauna cavien ei tochen 60 - 80 peis afuns. In pei 30 centimeters. Lura sundel semess en e fatg ina cuschina agl aug Gion encunter la casa. La tegia primitiva era ussa pari svanida. Jeu hai fatg da ziaghels e tablegiau cun aissas. Suenter hai encuretgi lavur a Stillwater ed era survegniu sco resgiader. Jeu mavel a cuost e pagavel quater dollars per jamna. Lura tschercau e priu si duas combras e pagau quater dollars per meins e lu schau vegnir era la famiglia a Stillwater; aschi ch' ei tucava per jamna buca ton sco jeu pagavel per mei sulet. En ina brev da 1873 di el d'esser staus 6 - 7 jamnas malsauns cun malcostas,

sturnez e febra dalla gnarva, negin che devi la veta. Schegie jasters tonaton giu bia visetas da Romontschs e Tudestgs.

1874 ils 3 da mars di el d'esser restabilius ed entschiet puspei a resgiar blocca; pagaglia 40 dollars per meins. El di: Sche jeu savess sglar ina notg tier vus, jeu prendess tuts vus mes cars cun mei ella America. El di puspei en ina brev pli tard cun 40 - 60 dollars per meins tunschevi pulit; mo muort la crisa e scartezia da daners seigien ei vegni sin mo 36 dollars per meins e tonschi strusch da pagar il da viver e tscheins casa. Era lamenta el da haver stuiu schar murir en quels onns treis affons pigns. In baret cuosti el marcau per cavar fossa 4 ½ dollar, in sempel vischi 3 dollars e per menar naven 7 dollars aschi mintga pintga sempla sepultura 14-15 dollars. Quei e la malsogna hagien effectuau ferm sin sias finanzas.

Gion Fidel ha fatg otg onns il resgiader en quei marcau. Ils 2 da mars 1879 dat el sclariment a siu frar giuven, che s'interesescha per la America: Sche ti havessess da sedecider da vegnir; mo quei sai jeu schon quei va vess da schar leu anavos quels paupers vegls, che han fatg ton per ses affons. Sche ti portas il sacrifici e stas cun els, lura recamondel fai la megliur cun els. Eis ti aber decidius da vegnir sche mirel jeu tei pli bugen oz che damaun. Havessess ti da vegnir sche lai far in vestgiu cun materia cumprada; carpun vegn pauc schazegiaus ella America; era buca camischas lenziel, hai priu dudisch e rumpel buca ora ellas, calzers mo in pèr, spargna las guotas: Mira da haver brav carn criua e caschiel, pertgei sin la mar eis gleiti unfis cun la maglia. E lu recamondel da far far il vischlè Lezi Balzart in vischi da lènn e pren en in per mei ed in auter cun dus liters vinars d'ansauna. Sche ti has pren per tei in tapet ed in plumatsch, quei sas duvra sin la mar ed era tscheuen. Sche ti vus lu maridar sas far aschi buna partida tscheu sco leu. Cheu ei da remarcar che Duri Battesta havess cun la pli clara glisch americana buca anflau ina dunna sco Barla Catrina Monn ei stada per el. Milsanavon cusseglia el al frar: Sche ti vuls vegnir ella America; tier tei ei enzatgei auter, che tier mei cun dunna e treis affons pigns. In giuven spargnus e luvrus vegn plitost tier enzatgei cheu, che en la Europa. Il Hendry Gion Antoni da Cavorgia che ei vegnius anen cun nus ha oz gia 2000 dollars; quel haveva era stuiu far empristar pil spiendi. Mia dunna di ch' ils Mugglis seigien buca glieud da cletg. Denton jeu sun partius da leu cun 2200 francs ed arrivaus a St. Henri cun nuot, stuiu luvrar diltut e stuiu gudignar il spiendi dad ira a Stillwater ad encurir lavur, giu plirs barets, mo tonaton tratg vinavon tochen oz. Il hafner havevi detg: La ventira seigi ina mes'ura distanza dalla sventira. Duri Battesta ei denton restaus a Rueras cun ses vegls e soras tschoccas. El ei maridaus igl onn 1885 ed ha giu duas feglias la Maria Culastia Muggli-Riedi e l'Onna Maria Muggli-Beer. Quellas vulessen creiel jeu oz buca, ch' ellas fussen alla America.

Aug Gion Fidel lamenta en ina brev da buca esser sentupaus cun sia sora Culastia, che vegneva da Messina cun siu um Gion Aluis Brugger ed in affon dad in onn ed in da pressapauc quater. Il discletg haveva vuliu, ch' il frar era gia a Cuera, cura che la sora ei arrivada a Rehanau cun la posta sul Spligia. Aschi damaneivel e buca sentupar haveva fatg mal als fargliuns che setenevan aschi car. Gion Fidel cusseglia en pliras brevs alla sora da vegnir ella America: Neu di el, neu cara sora tscheu fas ti e tuts pli tgunsch il vies da viver. Jeu hai era intervegniu ch' el marcau detti ei negins „Zücherbäcks“, sche igl um vul luvrar sin siu mistregn. Mumma Culastia ha denton preferiu da star a Rueras cun ses geniturs vegls e duas soras tschoccas, che havevan aschi basegns d'enzatgi che dess uorden. Ella mava dil di a cuser per il cuost e 60 raps schurnada. Igl um ei serendus giul Schuob per circa tschun onns e fatg il signun. Mo la paga era buca gest gronda e tratg giu enqual glas gervosa ed il fimar restava ei buca aschi bia per casa. Havess mumma Culastia suandau il clom dil frar ed ida ella America, sche havess il sur canoni Giusep Alois Brugger il buob pign dalla Culastia buca saviu celebrar siu giubileum sacerdotol da tschunconta onns a Rueras igl uost 1945. Era havess il Leci il buob grond buca saviu far pli che 60 onns cantadur ed organist a Rueras ed engrondir il vitg per duas casas novas.

Gion Fidel raquenta da Romontschs che savevien schar vegnir dretg negliu; seigien vegni tiegl agent da quella tiara e quel hagi detg: El vegli mussar ad els in liug niev, buna tiara schi bien sco zanua auter. Lu ha el priu ses cavals e menau els en in liug da planira quei ch' igl egl pudevi tscharner; mo planira, amiez in bi lag. Vesend quei bi lag hagien tuts clamau: Lag Badus, patertgond vil il Lag Badus ella patria veglia. Da cheu deriva il num Badus, segiramnein aschia numnaus dils Romontschs. La tiara

hagi plaschiu apparti bein a quels umens. E lura hagi igl agent detg: Il stadi dat giu tiara sut sequentas kundiziuns:

1. Vus saveis far in Climm e quei cuosta 14 dollars ed  $\frac{1}{2}$  pil stadi per las scartiras
2. Per il medem cheu seoblighescha ins da plantar 20 acters uaul ei aber in onn avon che l'auter possessur dil fatg. Las plantas ston esser quater peis ina ord l'otra. Suenten haver fatg il contract el decuors da sis meins ston ins esser sil prau, luvrar e cultivar per tschun onns; suenter quels tschun onns survegn' ins il Dit, che di proprietad per adina.
3. Ei dat ina tiarza fuorma numnada il Frintschen: cheu ston ins pagar 200 dollars; pagau ein ins possessur digl emprem mument naven. In Climm seigi 160 acters ed el manegia quei seigi aschi las squadra denter Rueras e Zarcuns

Essend ch' ei regi els marcaus gronda crisa da lavur ed igl ei en cuort temps stau fatg biars Climms. Jeu hai era cumprau in, di igl aug Gion Fidel, mo el numna buca ils auters, che han cumprau e maunca era ils nums da quels ch' eran stai ils emprems; fuss forsa d'eruir ellas gasettas da lezs onns 1878 - 1882.

Igl onn 1880 raquenta el vinavon: Hai fatg in viadi sil Badus, in vaidi da dus dis cun la viafier; ei 20 miglias cun carr e cavagl, Cura che hai viu quella biala situaziun da quella biala tiara nova sundel staus surprius e restaus 15 dis e gidau igl aug (tgeinin?) a rimnar siu graun. Essend miu prau aunc libers, sundel seresolvius da vegnir cheu a habitar primavera. Hai empruau da cavar ina cistiarna jeu e Giachen Francestg, ch' era vegnius dus dis suenter mei da Chicago. Havein cavau nov peis ault e giu aua avunda ed era buna aua. Sundel ius tier in vischin e quel ei vegnius cun ses cavals ed havein arau e semnau in toc per emprova. Cun il meini da vegnir il mars cun la famiglia hai bandunau il Badus.

L'auter onn 1881 scriva el: Ils 13 da fevrer sundel semess sin via per ira sil Badus e pagar miu prau, che custava 200 dollars; mo havevel schon tema da buca puder vinavon muort il ruh unviern, che havevan giu; per sin via hai saviu seperschuader las difficultads, cuflaus tochen 40 peis aults, la viafier interrutta. Sin quels embrugls sundel semanaus a St.Henri tier il car aug ed onda. Leu a St. Henri hai giu caschun da comprar 40 acters prau cun casa e stalla vitier. Hai stuii pagar 700 dollars, il miu prau sil Badus hai vendiu per 100 dollars sundel aschi daventaus in farmer da St.Henri enstagl in Baduser. Jeu crei da haver fatg meglier, pitir il freid stuein era buca cun 20 acters uaul. Alla mia dunna ed a mia quinada Mariuschla ha ei era plaschiu meglier a St.Henri, ch'egl allontanau Badus.

Ussa sco farmer a St.Henri raquenta el da haver giu in bien onn da fretg. El numna si cons puschels salins, cons puschels farmentun etc. Lura di el: Quei per mia mumma leu ora, ch' ella sappi, che havein manteni la cardientscha era en l' America. Jeu sun ius en ina Uniun da s.Giusep. All' entschatt ston ins pagar 10 dollars, suenter pagan ins  $\frac{1}{4}$  dollar per meins; ei vegn fatg mintga meins ina messa pils commembers, obligaziun da mintga commember prender treis ga penetenzia en in onn. Vegn ins malsaus, sche han ins mintga sera schei fa basegns dus umens, che miran tier, il malsau vegn sustenius cun 5 dollars per jamna. Tier la mort ston ins lu pagar in dollar e quel vegn tarmess tier alla dunna, ni als affons. Ein schon pli che 1000 commembers. En ina brev d' anno 1883 scriva el ils prezis dils animals, ina vacca 35 - 40 dollars, stiarls e stiarlas 12 - 15 dollars, bos da 4 - 5 onns 150 dollars. El havess era dus mo quels sappi el buca vender pervia dalla lavur cun quels ari el dis ora senza empalader, mo cun cumandar, gi ne ha; quels scarpian tut cuscha e tut quei che vegni avon en prau aunc buca cultivau. Pli tard ussa igl avrel hai aunc quels dus bos, treis vaccas ina hai cumprau per 30 dollars dattan brav latg, lura quater liufas, dus han 18 pigns; 45 gaglinas, in tgaun, dus gats e bia miurs. En la medema brev di el: Nus havein ussa plevon e caplon en la persuna da pader Monn. D' in pader Sigisbert Monn fa el menziun schon a Stillwater tier l'arrivada e partenza. Forsa il medem? 1884 oz ils 19 da mars havein buca firau, mo nossa uniun camonda da far firau e ses commembers en honor da nies s.patron Giusep al qual nossa uniun ei dedicata.

Havein uonn giu cheu ina malsogna da s.v. e piars massa; quei purtava era a mi ils daners, havevel mintg' onn da vender 8 -10 tocs. Vulessel aunc notificar ch'il sehelmeister Deragisch hagi fatg nozzas

cun ina vieua Livers da Segnas e fatg si ad ella 5000 dollars, Cara carn per suppa. El era ius ella America 1860 e fatg fortuna. 1880 ha el fatg ina viseta alla patria Tuatschina. En in auter liug dil el: Haveis udiu che tut ils Derungs ein seretratgs sil Badus. Da Gion Michel ed Emilia Derungs emigrai 1875 ils 5 d' avrel fa el schon avon menziun nua ch' el di: La Milia detschi, quels giuvens vegni en uonn seigien buca bilas avunda. Ella spetgi auters. (Ella ha lu maridau in Rensch da Trun ha giu 15 affons e morta cun 77 onns e 77 beadias ni beadis. Toni Derungs ei ius 1882 treis onns suenter ils dus affons avon numnai cun dunna e quater affons serendius ella America e lu ein tuts serendi sil Badus ed han leu fatg fortuna. Toni era gia ualti vegls cu el ei ius silla mar. Cura ch'in ha fatg sur da quei smarvegl ha el detg: A mi ei gest tuttina che jeu femi tubac cheu ni en l'America. Ins tschintschava, ch'ils Derungs seigien daventai milliunaris el Badus. Suenter gronda fortuna ein Gion Giusep e Gion Michel turnai en Tujetsch, il davos ha maridau Onna Maria Jacomet ch'era era stada ella America. Emigrada 1903 cun sia sora Rosa Martina turnadas anora 1908. La Rosa ei lu turnada anen e maridau Duri Giusep Monn Sedrun.

Vulein puspei cuntinuar a tedlar tgei igl aug Fidel scriva. Il fein vegn tier nus buca bugen scarts, quel maglian ils cavals. Las vaccas ston magliar strom salin e fermantun e vegnan adina pervesidas ordaviert. En nuegl hagi el giu mo ina e per metter ord nuegl stuiu haver zappun pervia dalla grascha schelada. En brev dils 5 d'avrel lamenta el da sgarscheivlas ferdaglias. El hagi grond temps stuiu trer en treia pera camischas e caltscheuls per secopentar. Ei forsa quei onn nua che era vegniu rapportau: Ch'ina posta arrivada a liug ils cavals pesuls il postigliun sil buc schelaus. Ella medema brev scriva el a siu frar ed a sia sora Culastia. Fagei bien cun quels paupers geniturs vegls e quellas duas soras tschoccas, fagei buca sco jeu fegl perdiu hai fatg ed ius aschi lunsch naven; quei roghel jeu vus cun las larmas giu per la fatscha e per la passiun da Cristus. Puspei perdetga dil bien cor.

En medema brev fa el menziun che la feglia gronda dil mistral Gieriet seigi vegnida ord l'Italia a visitar ses frars. Pli tard di el en ina outra brev, che quella feglia seigi morta el spital a S.Paul. (Mistral Gieriet habitava la casa da Duri Vigeli Cavegn, la vedra, fuvi possessur dalla Acla dallas Sorts; sco aunc oz usitau havevan ils mats cumpignau a casia il mistral e fagevan parada sur casa, cheu dat in in malprecaut siet e sieta giu in camerat, quei regorda nus la crusch sut casa fermada vid gliez clavau cun il datum 1826. Quei schabetg ha discurriu miu tat Leci, ch' era lura mat da 21 onn.) Gion Fidel, dil qual nus scrivin, haveva era maridau ina Muggli da Sedrun, sora dad Anselm Muggli, ch'era staus en California a cavar aur. Da vegnir anora sin l'aua vegnius a mauns a pirats, che han sblundergiu tut la finala mitschhaus cun la veta suleta. Sinquei era el vegnius empau curios. El haveva l'idea, ch'il vischin zepli fein dad el. Quei savevan ils stuccadurs e lu dumandavan ei el: Ha quei Toni aunc fein? Schiditg sco jeu hai ha il Toni era, fuvi la risposta. Anselm Muggli era ius anen 1854 morts 1901 a Sedrun.

En ina brev rauenta el da sias feglias aunc naschidas a Sedrun. La Maria Culastia seigi carschida ditg e restada pintga, quella Maria Culastia ei pli tard ida en claustra ed ha igl onn 1945 saviu celebrar siu giubileum da 50 onns profess; sco siu sur cusrin Giusep Aluis Brugger 50 onns spiritual. La Catrina ei 1895 maridada a S.Paul. Els havevan priu si ina farma da 20 vaccas, vendevan il latg el marcau e fagevan bein, Quasi en tuttas brevs plaida el da sia quinada Maria Ursula Muggli che ha cumpignau els sin viadi ed en l' America stada biars onns survients tier in spiritual. Fidel teneva car e respectava ses survetschs, quei muossan ora sias brevs. Cheu valan buca ils plaids, che sur Elvedi staus 29 onns caplon a Selva haveva detg en in priedi a Maria Hilf: Cons buns nundumbreivels survetschs fan quellas ondas buca maridadas allas famiglias e con pauca renconuschientscha anflan ellas? Ina gada aber sin baun da bara; tuttavia sch' igl ei aunc enzatgei d' artar, lu pon ins buca ludar avunda la buna onda: Ad ella auda in bi tschupi bialas flur, il pli bi tschupi.

1882 annunziescha Gion Fidel la naschientscha d'in taffer mat, il qual ei hagien mess num Alfons Maria Lignori. (Quel ei oz sin la farma dil bab, ei maridau ed ha era famiglia.) Quei onn scriva el era ch' il cusrin Giachen Martin seigi maridau cun ina tschecca brava matta e reha; gliez havessi il Giachen Martin buca grad giu basegns, essend sez fetg beinstonts: Ils geniturs da quella matta derivien digl Aargau. (La Rosa haveva era encuretgei si ils parents da sia mumma ed era anflau il bein da derivonza.)



Descendents da Gion Fidel Muggli (1839-1916) maridaus cun Onna Maria Muggli (1838-1920):

Maria Scholastica sora Amanda Muggli	12 matg 1867	12 zercladur 1959	muniessa
Anna Maria Katherine Muggli	21 schaner 1869	28 matg 1950	
oo Fridolin Beer Baer	28 fevrer 1868	30 zercladur 1915	
Leci Antoni Muggli	23 settember 1870		
Infans maris Muggli	8 settember 1871	8 settember 1871	
Alfons Maria Lignori Muggli	1 matg 1882	19 november 1965	
oo Anna Mary Germscheid	24 uost 1883	28 fenadur 1944	



Igl onn 1890 tschontscha el da terribla schitgira, tuttas fontaunas schetgas en. El havevi avon duas, ussa stuiu cavar quater vitier, cun sis mondi cun haver quitau e prender empau perina. Nus havein negins dutgs e flums. Tutta aua ei cistiarnas ella tiara. 1901 notificescha el la mort digl aug Giachen Martin Muggli il ner sco el vegneva numnaus leuen. (In tec historia gia scret avon.) Milsanavon di el: Jeu hai fatg ina viseta a S.Paul tier la feglia Catrina, ch'ei sco saveis maridada leu cun in Beer ed ha ina farma e vendan il latg el marcau. Da leu sundel ius a St.Joseph en calustra a visitar la feglia, ussa sora Amanda. Vegnend ella ella combra da viseta e vesend, ch'ei era siu bab, ha ella cargau a mi entuorn culiez, ditg e liung havein ton in sco l'auter buca saviu plidar in plaid. Revegni hai dumandau ella: Eis buca enriclada, fussess buca pli bugen ora el mund? O, na, na bab, buca per igl entir mund vuless jeu esser ora el mund.

Igl onn 1888 ils 14 da matg ein emigrai Sep Antoni Beart e siu frar Luis Beart. Cun Sep Antoni ei scribent da questas lingias aunc staus ad alp si Tiarms. Oz suenter pli che 60 onns regordel aunc cun stema e carezia da quei bien paster grond. Quei Beart, luvrus e spargnus sco el era, ha fatg fortuna e daventaus fetg reh. Auters vulan dir schizun milliunari. El vegneva era numnaus il bab dils Romontschs ed ha sco tal fatg bia bien sco ins ha adina udiu.

Da quels rauenta igl aug sequenta interessanta sentupada. Sin via d'ira en baselgia entaupel jeu la posta. Vargaus in per pass cloma in anavos: Resda te romontsch sche te sas. In per plaids engles al postigliun da tener in mument, hagi el rispundiu: Ge, ge, iu sa romontsch; tonpli cumpatriot da Tujetsch seigi la sorpresa aunc stada pli gronda; perquei di hagian ei vuliu ira a maner tier Vigeli Beer, mo seigien vegni suenter in di e lu havein discurriu dil car Tujetsch. El di lura: Quels stattan cheu in tier Vigeli Beer, tschels dus tier frars Degonda. Il tierz era Vigeli Schmed, fegl dalla aschi numnada Magdalena. Quella haveva aunc in fegl Toni, quel seigi daus per tiara durant ch'el mulschevi e staus ina bara. Quei era in bien giuven. Degonda frars eran mattei fegls dalla vieua Onna Maria Degonda-



Muggli, ch'era ida ella America 1866 ils 14 d' avrel cun siat pigns affons; il pign havevi ella purtau si da Surrein el scussal per ira ella America. Quella curascha dalla paupra vieua ei semantenida tochen oz ella bucca dil pievel. Quella curascha ha Dieus benediù. Ella America ei iu bein cun ella e quei a St.Henri nua che ella era secolocada sper auters Romontschs. Ella ei morta ils 8 d'uost 1890 veglia 62 e siat meins. Manegias ti buca era, quei era stau curascha in da quels viadis cun tons affons pigns. Quei era saung Muggli. Nus admirein quella curascha tonpli che savein che aug Gion Fidel Muggli era staus 18 dis sin l' aua e 35 dis sin viadi tochen St.Henri. La vieua Degonda-Muggli haveva en scadin cass buca giu duvrau pli pauc temps otg onns avon. Quei era buca sco oz, ch' ins drova mo 6 - 8 dis cun ils vapurs moderns.

Igl onn 1895 scriva el puspei: Perdunei da miu retard cun risposta sin Vossa brev e sin quella dil carezau sur figliol Giusep Alois. Il motiv ei che jeu level far a vus tuts ina sorpresa e vegnir mez enstagl la brev sin la fiasta da vossa casa, la primizia da miu sur figliol Giusep Alois Brugger. Mo mia speranza ei fallida laschond mes reumatissems buca suenter. Era mia glied bargeva e schevan. Bab sche vus meis ella Europa vesein nus vus buca pli. Hai lu era mez viu en ch' ei seigi meglier da buca ughegiar in aschi grond viadi cun mias forzas spossadas. Bugen vulesse jeu dar tut quei che jeu hai, sche jeu savessel esser leu cun vus, quei grond e ventireivel di; sco sperein en tuttas fidonza sin Diu.

Starschau: 1900 haveva el aunc notificau la mort da sia cara onda Onna Maria Schmet-Muggli la quala nus havein empriu d' enonuscher sco paupra bandunada vieua a Ohio a Stillwater e suenter ella tegia a St.Henri. En ina outra brev di el d' esser staus sil Badus cun siu cusrin Giachen Martin. Igl aug hagi giu grond legherment da veser puspei ina gada suenter 30 onns quels dus cusrins. Igl aug hagi dus buobs e duas buobas. Mo tgi ei quei aug? Tenor miu calcular tras il cudisch da Guglielm Gadola vegn ei ad esser il Muggli reh, emigraus 1872 e numnaus statalter Sep Antoni Muggli. 1907 di el da haver cumprau vitier il siu aunc 40 achers prau, mo stuiu pagar car. Per igl emprem prau hagi el pagau 7 dollars. Ussa paghien ils tgaus gross, che veglien magliar en tut tochen 70 - 80 igl acher ed aunc dapli. (Para ina tendenza er a nus buca jastra.)

En ina outra brev senza datum di el: Havein giu viseta dil Badus, dus Mugglis ed in Felici Berther. Quei vegn ad esser stau fegl da Giachen Francestg Berther ch'era emigraus 1880 ils 20 da fevrer cun dunna e tschun affons. Il vegl pudeva esser 12 - 13 onns. Quels habitavan la casa da Lucas Cavegn la stiva dadens, nua ch'ei vegn oz fatg ustria. Giachen Francestg Berther ei beingleiti serendus sil Badus, mo gleiti morts. Il fegl vegl il Casper Antoni ha da leu anora scret a scribent da questas lingias, ch'il bab seigi morts. Stuend murir in genitur u l'auter seigi aunc stau meglier il bab. Las vieuas vegnan sustenidas dil stadi.

En in auter liug di igl aug Gion Fidel: Jeu erel a S.Paul per ina cuorta viseta a mia feglia Catrina Beer. Cheu ein serimnai la sera plirs Romontschs: il Loretz tudestg (emigrai 1903), il giuven Stiafen Schmed, fegl pign da Gion Antoni Schmed-Maculin e lura il Gambun. Havein fatg fiasta e bui gervosa e dau troccas. Suenter hai mai viu pli quels. Era hai aunc mai viu las mattauns Jacomet, era vegnidas anen uonn. Lu di el al frar Duri Battesta: jeu hai dapresent quater cavals e sche ti vuls vegnir en per dus, sas haver per nuot cun cumet e tut, mo cundiziunau da tener els schuber. En brev da 1906 di el: Ussa saiel dar si mes plans da vegnir a Rueras a visitar mes fargliuns. Nus essan scurdai, jeu e mia dunna. Nus mein encunter ils siatonta. Nus vulein haver speranza da star ensemen enta parvis.

Grond legherment havein era sentiù di el a siu frar Duri Battesta che tia dunna ei puspei megliurada. Quella dunna da Duri haveva giu ina nauscha malsogna, che tut spitgava la mort. Il pli grond filosof (Capeder) da Rueras scheva: Ei bein donn, la megliera femna da nies vitg, stuer murir aschi giuvna. Sin cussegiar eis ella ida a Trun tier il sur nevs plevon e la quinada Culastia. Il midar clima ed il bien uorden dalla quinada han puspei restabiliu ella. Schegie malsaua haveva ella aunc stuiu ira il Sontgicrest tochen giu avon baselgia per smarvegl da tutta glied. Ei schevan in si per l'auter: Co ei quei stau pusseivel a quella persuna da serabitschar tochen cheu. Era scheva siu um da natira humoristics: Quei di stueva mia dunna mo far mucs ed ei sederscheva glied sco mustgas per plaun. NB Quella epusoda aunc en memoria dalla cara onda e quinada, ch'il scribent da questas lingias teneva aschi car. Ella ei morta 1930, ils 7 da zercladur. Otg onns suenter il mariu.

1913 11-12, quella gada sai dar a vus trestas novas. Igl um dalla feglia Catrina ei morts anetgamein dallas quater suentermiezdi; tuccaus dalla solegliada. Ins ha purtau el el spital e fatg tuttas emprovas per far revegnir, mo tut stau adumbatten. Il tgerp havevi in barschament da 113 grads. El ei staus treis dis en bara a S.Paul e lu suenter in di tier nus a St.Henri. ei lu vegnius satraus cheu sin giavisch da mia feglia Catrina. Il feagl dalla Catrina ei circa 16 onns. Il Fred era segiraus per 1000 dollars. In pign agid per la mumma e feagl. Quei feagl Gion ei lu enzacons onns pli tard sedisgraziaus vid la viafier. Il co e cum hai buca anflau per scret. Cuserina Catrina ei vegnida tragicamein privada digl um e dil feagl Gion. Ella viva aunc oz ed ha circa 78 onns. Quei speronza! Havein inn onn buca novas.

Igl aug di vinavon: Vargau circa in meins scriva il Leci Antoni, che l'onda Mariuschla seigi malmalsauna. Essan sinquei serendi bein spert a S.Paul. Ella ha enconuschiu nus, mo strusch pudiu plidar. Ella ha pigliau malcostas e vivida aunc nov dis. Ella ei stada en bara a S. Paul treis dis ed in di a St. Henri, nua che havein satrau ella sper il Fred, igl um dalla Catrina. La muniessa Amanda era era stada dus dis a S.Paul sin la fin dalla onda per engraziament era dil bien, che l'onda haveva fatg era cun ella e dau ils raps d' ira en claustra. Starschau 1911, leu di el: Sch'ils raps tonschan, tarmettein aunc in cudisch cun scartira gronda cun ina memoria dalla buna sora Culastia morta a Trun ils 28 da fevrer 1911. A Trun ei era morta l'onda Meia tschocca, sco nus schevan. Ella scheva adina paternos tiels treis s.retgs, per ina buna mort, ed ei morta la fiasta dils treis s.retgs 1910. Igl atun ei lu era sia sora Barla Crsitgina morta. Ella haveva grad retschiert la s. communiun. L'onda Barla, la dunna da siu frar, che mirava tier ella ei suenter la communiun ida en cuschina per in sluc caffè. Returnond era la buna gia morta.

Igl atun 1911 ei nies bab Gion Aluis Brugger morts a Trun tier il sur feagl, che haveva priu giu ils geniturs e quella onda tschocca e giu quitaud dad els. Havein aschia en biabein in onn giu quater baras en famiglia. Ruaus als cars morts. In grond engraziament a miu car sur frar, che ha giu ton quitaud per nos cars.

Tenor brev dils Leci Antoni ei igl aug Gion Fidel morts ils 28 da december 1917. Staus 15 dis malsaus e vegnend la feglia muniessa Amanda dus dis avon sia mort hagi el detg: Ussa sundel pinaus. O, Segner jeu hai cheu entuorn mei tut mia famiglia. En pliras brev exprima el il legherment dad haver aschi ina buna feglia muniessa. Quei seigi consolaziun sin pugn da mort e vegn ad haver seregurdau dil bab cun biaras ferventas oraziuns en claustra.

Cun caschun dalla mort da mia cara dunna Maria Culastia Monn, ils 19 d'uost 1941 ha la cara cusrina muniessa Amanda scret: La regla dalla claustra oblighescha cura ch'ei mieri in parent dallas soras, hagian tuttas l'obligaziun dad urar per quei tal defunct. Ei era ina consolaziun per l'olma. Hai aunc giu starschau en ina brev haveva igl aug aunc giu menziunau d' in spiritual Rensch da Zignau, ch' era staus ella America a visitar ses frars e cun quella caschun visitau tuts cumpatriots. Quel hagi era empermess ad el da metter giu ils salids a siu figliel Giusep Alois Brugger el seminari a Cuera. Quei era persummau 1890 - 95.

Ussa sundel alla fin cun mia lavur sur ils Mugglis. Hai aunc en egl ina persuna. Forsa vegnel lu da cumpletar ina caussa u l' outra. Duess enzatgi haver interess per mia lavur, lura supplicheschel dad haver pazienza cul scarvon, hai mai scret bein, ed oz cun 77 ½ onn vul ei era nuota dabot vegnier meglier.

NB Ils emprems sil Badus duessien esser stai Bürglis da Surrein-Sumvitg. Il stadi havevi empermess in premi alla emprema buoba che neschi en quella nova tiara e quella buoba hagian quels giu, che seigi pli tard daventada la dunna da Casper Derungs.

Per cumpletar quellas notizias dils frars Muggli stoiel aunc scriver in per plaids da Giachen Martin Muggli numnaus il ner. Quel teneva miu tat Leci buca aschi car sco l' auter igl aug Giachen. Gia cheu havevi el il gust da marcadar. Returnond dalla fiera da Ligiaun haveva el cun buca pign quet detg al tat Leci: Grad 1000 renschs hai jeu gudignau cun mia marcanzia. Tat Leci scheva, ch'el hagi gnanc pudiu far bucca da rir e detg sin quei: Pli bugen havess jeu giu sche ti havess spiars els. Ed el hagi giu

raschun. Suentar hagi el lu spiars e mess tut ed aunc empau rauba dils fargliuns. Ella America hagi el era spiculau e viagiou dapertut e la finala morts paupers sco las miurs baselgia el spital a Mineapolis. La feglia Fausta hagi gidau sco ella hagi saviu e pudiu, flaghegiond els en ses vegls dis, mo era retschiert da Diu la pagaglia. Entrar ina buna reha maridaglia. El haveva era giu fegls, mo quels ein spari senza schar anavos in fastitg, deno in e quel vulein schar dar il fastitg. La sora dils sis frars ida ella America cun igl aug Giachen seregordel endretg fuvava ella era morta baul. Notizias dad ella hai anflau nuot ellas brevs. Dieus detti a tuts la pasch perpetna.

Arisguard ils Mugglis aunc ina revista. La perdita Rosa sco nus enconuschein schon ella, haveva cun quella caschun era fatg ina viseta alla sala da dertgira el Hof a Trun e leu viu e fotografau igl uoppen Muggli; schau luvrar ora el ella America ed era tarmess a nus. Tenor quei uoppen, che datescha da 1665 cul num Stiafen Muggli, havein concludiu; quei tal vegni avon ellas disputaziuns da cardientscha dil 16avel tschentaner a Cuera, fuvava da Trimmis. Restaus catolics ha el mattei preferiu da vegnir siaden lunsch en aria spir catolica. El vegn era ad haver giu uffecis en nies cumin, schiglioc fuss igl uoppen buca a Trun en sala da dertgira.

Guglielm Gadola di en siu cudisch, che 36 Mugglis hagian bandunau Tujetsch, da maniera, ch 'ils Mugglis ein morts ora en Tujetsch, mo flureschan tonpli ella America.

(Fegl separau)

En ina claustra da Franziscanras havein nus duas vischinas soras muniessas. Ina haveva num da batten Marta, ha num sco muniessa Maria Francisca, naschida 1895, ida en claustra anno 1915. L' altra sora num da batten Margheta naschida 1896 ida en claustra ? num sco muniessa Maria Ursula. Dieus benedeschi lur opperar.

Ils davos che han bandunau Tujetsch e serendi ella America ein stai dus fegls da Gion Antoni Monn-Monn da Surrein; Alois haveva maridau Barla Deflorin da Tschamut e l' auzter frar Flurin ina Riedi Maria, numnada la bellezza da Tschamut.

Las duas sura soras eran feglias da Giachen Giusep Deplatz e Lisabeth Berther, quels han era cheu la ventira d' ina muniessa a Baldegg cul num Maria Elisabeth, num da batten Anastasia.